

Balki den Wowo!

Ku frekuensia—tantu den kombersashon privá komo charla públiko—e preokupashon ta ekspresá ku nos islanan ta bai di malu pa pió. Un solushon propone ku regularidat ta: nos tin ku rekobrá nos normanan i balornan.

E konseho ta na su lugá. Ma mi tòg ta keda ku siertu inkietut. Deklarashonnan asina por ta un kapa (talbes inkonsiente) pa evitá responsabilidat personal. Kiko mi ke men?

1) T'e komunidad! Tantu hende ta proklamá ku nos *komunidad* mester rekobrá su normanan i balornan. Ma bo por prediká e mensahe ei pa siglonan sin mira kambio, pasobra *e komunidad ta konsistí di personanan individual*. **Un komunidad por rekobrá su normanan i balornan solamente ora *personanan* ta apliká e normanan i balornan pèrdí.** Mustrando dede riba e komunidad, por ta un manera pa skapa responsabilidat personal: si nos tur (kolektivamente) ta kulpabel, anto ningun di nos (individual) ta kulpabel.

Esnan ku ta proklamá ku nos *komunidad* mester rekobrá su normanan i balornan por splika kon esaki mester sosodé apart di personanan individual? Talbes e komunidad mester tene un manifestashon masal protestando ku bos unánimo? Nan ta visualisá ku mester bin un lei: “Desde awe, nos tur lo biba segun e normanan i balornan di aña 1950”?

Pa muestra dede riba e komunidad ta solushoná nada. Solamente ora bo ta bira e dede ei den bo mes direkshon, **tumando responsabilidat personal pa biba conforme ku e normanan i balornan ku Dios ta preskribí,** por tin kambio.

2) Ta nan! Tin hende ku, bulando pipa pa ku nan responsabilidat personal, ta pone responsabilidat riba skouder di un òf otro líder pa trese kambio den nos komunidad. E suidadano ta opiná ku gobièrnu i polis mester inisiá kambio. Parokianonan ta haña ku ta pastor su trabou. Mayornan ke pusha e tarea pa dosentenan, mientras yùfrou di skol ta para riba ku ta responsabilidat di tata i mama. Kada un ta muestra dede riba otro, **sin ahustá nan mes bida na e normanan i balornan tan deseá.** Kon ta pusibel ku por tin kambio asina?

3) Ta mi! Den muchu kaso, esun ku ta proklamá ku nos komunidad mester rekobrá nos normanan i balornan, ta deseá pa **otro hende** apliká nan palabranan, **ma nan mes no ta despuesto pa hasié.** Tin un distansia enorme entre loke nan ta prediká i loke nan ta praktiká. E mensahe ku nan ta komuniká bon kla ta, **“Hasi loke mi ta bisa, no hasi loke mi ta hasi!”**

Unda ta esnan den nos komunidad ku no solamente ta reta e habitantenan di nos islanan pa hiba bidanan responsabel i moral **ma tambe ta duna un bon ehèmpel pa sigui?** Sin duda tin un skaresdat di hende ku ta despuesto pa bisa umildemente, “Sigui mi ehèmpel!”

No ta un kos di orguyo pa *bisa i muestra* hende kon pa biba. Bes tras bes apòstel Pablo a bisa hende pa no solamente skucha su palabranan, ma tambe sigui su ehèmpel. El a bisa: “...sea imitadónan di mi meskos ku ami tambe ta di Kristo”; “...sigui mi ehèmpel...”; “e kosnan ku boso a siña i a risibí i a tende i a mira den mi, praktiká e kosnan aki...” (1 Korintionan 4:16; 11:1; Filipensenan 3:17; 4:9).

Hesus a duna un ehèmpel humoristiko, “*Kon bo por bisa bo ruman: ‘Lagámi saka e stòf for di bo wowo,’ i mira, (tin) balki...den bo mes wowo?’*” (Mateo 7:4). Den otro palabra: sòru ku bo mes bida ta bon promé ku bo ta habri boka!

Ta un echu ku **hende ta siña muchu mas mihó dor di ehèmpel,** no palabra so. Sin duda nos mester sigui promové normanan i balornan sano na nos islanan. Ma e mensaha aki lo resoná muchu mas kla ora e ta sali fo’i boka di hende ku ta tuma su responsabilidat personal na serio pa biba loke nan ta bisa, ku ta saka e balki for di su mes wowo promé.